



編修臣陳嗣龍
檢討臣彭元琬
恭校

卷三百八十六

續通志

列傳 一百十五

宋

周執羔

王希呂

陳良祐

李浩

陳橐

胡沂

唐文若

李燾

周執羔字表卿。信州弋陽人。宣和六年。舉進士。廷試。徽宗擢為第二。授湖州司士曹事。俄除太學博士。建炎初。乘輿南渡。自京師奔詣揚州。不及。遂從隆祐太后于江西。還覲會稽。尋以繼母劉疾。乞歸就養。調撫州宜黃縣。

丞。時四境倣擾。潰卒相挺為變。令大恐。不知所為。執羔諭以禍福。皆斂手聽命。既又執首謀者斬以徇。邑人德之。繪像立祠。歷通判湖州。平江府。召為將作監丞。累遷右司員外郎。擢權禮部侍郎。充賀金生辰使。往歲奉使官得自辟其屬。賞典既厚。願行者多納金以請。執羔始拒絕之。使還。兼權吏部侍郎。同知貢舉。以言事忤秦檜。御史劾罷之。起知眉州。徙閬州。又改夔州。兼夔路安撫使。溱播蠻叛。其豪帥請遣兵致討。執羔謂曰。朝廷用爾為長。今一方驛騷。責將焉往。能盡力則賞爾。一兵不可得也。豪懼。

斬叛者以獻。移知饒州。尋除敷文閣待制。乾道初。守婺州。召還。提舉佑神觀。兼侍講。首進二說。以為王道在正心誠意。立國在節用愛人。二年。復為禮部侍郎。孝宗患人才難知。執羔曰。今一介干進。亦蒙賜名。口舌相高。殆成風俗。豈可使之得志哉。帝曰。卿言是也。拜本部尚書。升侍讀。固辭不許。帝嘗問豐財之術。執羔以為蠹民之本。莫甚於兵。古者興師十萬。日費千金。今尺籍之數。十倍於此。罷癯老弱者幾半。不汰之。其弊益深。論和糴本以給軍興。豫凶災。蓋國家不得已而為之。若邊境無事。

妨於民食。而務為聚斂。可乎。舊糴有常數。比年每郡增至一二十萬石。今諸路枯旱之餘。蟲螟大起。無以供常稅。況數外取之乎。宜視一路一郡一縣豐凶之數。輕重行之。災甚者。蠲之可也。詔從之。求去。帝謂輔臣曰。朕惜其老成。宜以經筵留之。除龍圖閣學士。提舉佑神觀。在經筵二年。每勸帝以辨忠邪。納諫爭。帝深知其忠。明年告老。帝諭曰。祖宗時。近臣有年逾八十尚留者。卿之齒未也。命却其章。未幾。復申前請。詔提舉江州太平興國宮。賜茶藥御書。時閩粵江西歲饑。盜起。執羔陛辭。以為

言。詔遣太府丞馬希言使諸路賑救之。六年卒。執羔立朝無朋比。治郡廉恕。有循吏風。手不釋卷。尤通于易。

王希呂。字仲行。宿州人。渡江後。自北歸南。既仕。寓居嘉興府。乾道五年。登進士科。六年。召試。授祕書省正字。除右正言。時張說以攀援戚屬擢用。再除簽書樞密院事。希呂與侍御史李衡交章劾之。帝疑其合黨邀名。責逵小監當。既而悔之。改授宮觀。去國之日。屏徒御。躡履以行。恬不為悔。由是直聲聞于遠邇。淳熙二年。除吏部員外郎。尋除起居郎。兼中書舍人。淮右擇帥。命希呂知廬

州。兼安撫使。修葺城守。安集流散。兵民賴之。加直寶文閣。江西轉運副使。五年。召為起居郎。累遷吏部尚書。求去。乃除端明殿學士。知紹興府。尋以言者落職。希呂天性剛勁。遇利害無回護意。惟是之從。嘗論近習用事。語極切至。佐漕江西日。作拳石記。以示僚屬。一幕官舉筆塗數字。舉坐駭愕。希呂喜其不阿。薦之。治郡百廢俱興。尤敬禮文學端方之士。操行廉潔。至無屋可廬。由紹興歸。猶寓僧寺。帝聞之。賜錢造第。後以疾卒于家。

陳良祐。字天與。婺州金華人。年十九。預鄉薦。紹興二十

四年。擢進士第。調興國軍司戶。以薦除太學錄。樞密院編修官。累遷軍器監。兼鄧王府直講。隆興元年。出為福建路轉運副使。明道三年。除起居舍人。兼權中書舍人。遷起居郎。尋除右司諫。首言會子之弊。願捐內帑以舒細民之急。帝曰。朕積財何用。發內府白金數萬兩。收換會子。收銅版勿造。軍民翕然。未幾。戶部得請。改造五百萬。又奏陛下號令在前。不能持半歲久。以此令民。誰能信之。既而又欲造會子二千萬。屢爭之。不得。遂請以五百萬換舊會。俟通行漸收之。當使不越千萬之數。帝銳

按周密齊東野語載張說奏置酒延客良祐不至說復奏之中批除諫議大夫宋史不載謹加案聲明

意圖治。以唐太宗自此。良祐言太宗政要。願賜省覽。擇善而從。知非而戒。使臣為良臣。勿為忠臣。帝曰。卿亦當以魏徵自勉。又言陛下躬行節儉。弗殖貨利。或託肺腑之親。為市井之行。以公侯之貴。牟商賈之利。占田疇。擅山澤。犯法冒禁。願嚴戒敕。遷右諫議大夫。按周密齊東野語云。張說

奏置酒延眾侍從。帝許之。客畢集。獨良祐不至。說不平。奏臣奉旨而後敢集客。陳良祐不至。是違聖意也。中批陳良祐除諫議大夫。此

兼侍講。同知貢舉。累遷吏部尚

書。時議遣使請地。良祐奏。遣使乃啓釁之端。萬一敵騎侵邊。則民力困於供輸。州郡疲於調發。兵連禍結。未有息

期。且今之求地。欲得河南。曩歲嘗歸版圖。不旋踵而又失。如其不許。徒費往來。若其許我。必邀重幣。經理未定。根本內虛。又將隨而取之矣。必須遣使。則祈請欽宗梓宮。猶為有辭。內視不足。何暇事外。邇者未懷。豈能綏遠。奏入。忤旨。貶瑞州居住。尋移信州。九年。許令自便。淳熙四年。起知徽州。尋除敷文閣待制。知建寧府。卒。

李浩。字德遠。其先居建昌。遷臨川。浩早有文稱。紹興十二年。擢進士第。時秦熈以宰相子魁多士。同年皆見之。浩獨不往。調饒州司戶參軍。襄陽府觀察。推官。繼調金

州教授。改太常寺主簿。尋兼光祿寺丞。輪對。首陳無逸之戒。且言宿衛大將楊存中。恩寵太過。帝悟。旋令就第。自秦檜用事。塞言路。及帝總攬權綱。激厲忠讜。此習尚存。朝士多務慎默。至是命百官轉對。浩與王十朋。馮方。查籥。胡憲。始相繼言事。聞者興起。浩不安於朝。請祠。主管台州崇道觀以歸。孝宗即位。以太常丞召。時張浚督師江淮。宰相多抑之。浩引仁宗用韓琦。范仲淹。詔章得象故事。乞諭令同心協濟。兼權吏部郎官。浩雅為湯思退所厚。御史尹穡欲引之以共擠浚。因薦浩。及對。乃明

示不同之意。二人皆不樂。踰年。始除員外郎。兼皇子恭王府直講。在王府多所裨益。未幾。宰相名為郎者四人。將進用之。尤屬意浩。浩嘿然無一辭。同舍皆遷。浩獨如故。踰年。浙河水災。詔郎官館職以上。條時政闕失。浩即奏疏指論近臣。併及宰執。惟奉行臺諫多迎合。百執事顧忌畏縮。反覆數千言。帝不以為忤。用事者深忌之。乞外。得台州。州有揀中禁軍五百人。訓練官貪殘失衆心。不逞者因謀作亂。浩推其為首者四人。黥徙之。迄無事。除直祕閣。並海有宿寇。久不獲。浩募其徒。自縛贖罪。即

得其魁。里豪民鄭憲。以資給事權貴人門。囊橐為姦。事覺。械繫之。死獄中。盡籍其家。徙其妻孥。權貴人教其家訟冤。且誣浩以買妾事。言者用是擠之。疏方上。權參政劉珙越次奏曰。李浩為郡。捕治豪民。為其所誣。臣考其本末。甚白。帝曰。守臣不畏彊禦。豈易得邪。遂留中不下。大理觀望。猶欲還其所沒貲。帝批其後曰。台州所斷。至甚允當。鄭憲家資。永不給還。流徙如故。浩始得安。明年。除司農少卿。時朝廷和糴米八萬。董其事者。賤糴濕惡。隱剋官錢。戶部不敢詰。浩白發其姦。下有司窮竟。戶部

欲就支稽見數。大理附會之。浩爭曰。非但惠姦。且虧軍食。帝是其言。遂除大理卿。浩前在司農。嘗因面對。陳經理兩淮之策。至是。為金使接伴還。奏曰。臣親見兩淮可耕之田。盡為廢地。心嘗痛之。條畫營屯。以為恢復根本。又言。比日措置邊事。甚張皇。願戒將吏。嚴備禦。無規微利近功。日與大臣修治具。結人心。持重安靜。以俟敵釁。帝悉嘉納。宰相議遣泛使。浩與辨其不可。至以官職誅之。浩怒。以語觸之。且力求外。以直寶文閣。知靜江府。兼廣西安撫使。帝諭大臣曰。李浩營田議甚可行。大臣莫

有應者。浩至郡。舊有靈渠。通漕運及灌溉。歲久不治。命疏之。民賴其利。邕管所隸安平州。其酋恃險。謀聚兵為邊患。浩遣單使諭以禍福。且許其引赦自新。即謝過。焚徹水柵。聽約束。治廣二年。召還。入對。論俗不美者八。其言曰。陛下所求者規諫。而臣下專務迎合。所貴者執守。而臣下專務順從。所惜者名器。而僥倖之路未塞。所重者廉恥。而趨附之門尚開。儒術可行。而有險詖之徒。下情當盡。而有壅蔽之患。期以氣節。而偷惰者得以苟容。責以實效。而誕慢者得以自售。上問誕慢謂誰。浩具以

實對。翌日。謂宰相曰。李浩直諫。遂除權吏部侍郎。時政府有怙寵竊權者。黨與非一。自浩之入。已相側目。且欲以甘言誘之。浩中立不倚。於是嗾諫議大夫姚憲。論浩以彊狠之資。挾奸諛之志。寘之近列。變亂黑白。未及正謝而罷。乾道九年。提舉太平興國宮。明年夏。夔路闕帥。命浩以祕閣修撰往。夔有羈縻州曰思州。世襲為守者田氏。與其猶子不協。將起兵相攻。浩草檄。遣官為勸解。二人感悟。盡釋前憾。邊得以寧。以疾請祠。提舉玉隆萬壽宮。命未至而卒。詔特贈集英殿修撰。浩天資質直。涵

養渾厚。立朝以時事為己任。忠憤激烈。言切時弊。不以利害動其心。為郡尤潔已。自海右歸。不載南海一物。平生奉養如布衣時。風裁素高。人不敢干以私云。

陳橐。字德應。紹興餘姚人。登政和上舍第。教授寧州。以母老。改台州士曹。治獄平允。易越州新昌令。以愷悌稱。呂頤浩欲援為御史。約先一見。橐曰。宰相用人。乃使之呈身耶。謝不往。趙鼎、李光交薦其才。紹興二年。除監察御史。論事不合。詔以宰邑有治行。除江西運判。瑞昌令倚勢受賂。橐首劾罷之。期年。所按以十數。至有望風解

印綬者。乞歸養母。詔橐善撫字。移知台州。台有五邑。橐先嘗攝其三。民懷惠愛。越境歡迎。不數月。丁母憂。州人相率赴行在。請起橐。帝謂近臣曰。陳橐有古循吏風。服闋。以司勳郎中召。累遷權刑部侍郎。時秦檜力主和議。橐疏謂二聖遠狩沙漠。百姓肝腦塗地。今天意既回。兵勢漸集。宜乘時恢復。以雪國恥。否亦當按兵嚴備。審勢而動。舍此不為。乃遽講和。何以繫中原之望。既而金厚有所邀。議久不決。將再遣使。橐復言。金每挾講和以售其謀。論者因其廢。劉豫又還河南地。遂謂其有意於和。

臣以為不然。金之立豫。蓋欲自為捍蔽。使之南窺。豫每犯順。率皆敗北。金知不足恃。從而廢之。豈為我哉。河南之地。欲付之他人。則必以豫為戒。故捐以歸我。往歲金書嘗稱歲幣多寡。聽我所裁。乃竟反覆如此。且割地通和。則彼此各守封疆可也。而同州之橋。至今存焉。恐假和好之說。騁謬悠之辭。包藏禍心。變出不測。願嚴戰守之備。使人人激厲。常若敵至。苟彼通和。則吾之振飭武備。不害為立國之常。如其不然。決意恢復之圖。勿循私曲之說。庶梓宮太后可還。祖宗疆土可復矣。檜憾之。索

因力請去。未幾。金果渝盟。除徽猷閣待制。知潁昌府。時河南新疆初復。無敢往者。索即日就道。次壽春。則潁已不守。改處州。又改廣州。兵興後。廣東盜賊無寧歲。十年九易牧守。索盡革弊政。以恩先之。民皆悅服。初。朝廷移韓京一軍屯循州。會郴寇駱科犯廣西。詔遣京討之。索奏廣東累年困於寇賊。自京移屯。敵稍知畏。今悉軍赴廣西。則廣東危矣。檜以索為京地。坐稽留機事。降秩。屢上章告老。改婺州。請不已。遂致仕。又十二年。以疾卒。索剛介。不事產業。先世田廬。悉推予兄弟。在廣積年。四方

聘幣。一不入私室。既謝事歸剡中。寓僧寺。日糴以食。處之泰然。王十朋為風土賦。論近世會稽人物。曰杜祁公之後。有陳德應云。

胡沂。字周伯。紹興餘姚人。父宗伋。能守所學。不逐時好。時稱醇儒。沂穎異。六歲。誦五經皆畢。不忘一字。紹興五年。進士甲科。累任州縣。至二十八年。始入為正字。累遷右司員外郎。孝宗受禪。除國子司業。鄧王府直講。擢殿中侍御史。有旨。侍從臺諫條具方今時務。沂言。守禦之利。莫若令沿邊屯田。東作方興。且慮敵人乘時驚擾。宜

聚兵險隘防守。詔行其言。御史中丞辛次膺論。殿帥成閔。黷貨不恤士卒之罪。詔罷殿前司職事。與祠。沂再言其二十罪。遂落太尉。婺州居住。沂又言。將臣定十等之目。令其舉薦。施之擇將之項。則可。施之養士。則未也。夫設武舉。立武學。試之以弓馬。又試之以韜畧之文。兵機之策。蓋將有所用也。除高等一二名。餘皆吏部授。以權酷征商。所養非所用。所用非所養。願詔大臣詳議。中舉者。定品格。分差邊將下。準備差遣。則人人思奮。應上之求矣。從之。時龍大淵。曾覲。以藩邸舊恩。除知閤門事。沂

論其市權招士。請屏遠之。未聽。而諫官劉度坐抗論左遷。沂累章益懇切。曰。大淵覲。不屏去。安知無柳宗元。劉禹錫輩。撓節以從之者。好進者嫉其言。共排之。沂亦以言不行。請去。遂以直顯謨閣。主管台州崇道觀。乾道元年。召為宗正少卿。尋兼侍講。進中書舍人。給事中。進對。論命令當謹之於造命之初。帝曰。三代盛時如此。卿職在繳駁。事有當然。勿謂拂君相不言。除吏部侍郎。兼權尚書。沂奏請令敕令所官纂修七司法。頒之中外。庶可戢吏胥之姦。詔行之。尋以目疾丐祠。六年。以徽猷閣待制知處州。復引疾。提舉

江州太平興國宮。八年。以待制除太子詹事。尋復拜給事中。進禮部尚書。並兼領詹事。又改侍讀。帝顧沂厚。有大用意。而沂資性恬退。無所依附。數請去。虞允文當國。希旨建策復中原。沂極論金無釁。而我諸將未見可任。此事者。數梗其議。遂以龍圖閣學士。仍提舉興國宮。淳熙元年。卒。謚獻肅。

唐文若。字立夫。眉山人。父庚。在文苑傳。文若少英邁。不羣。為文豪健。登進士第。分教潼川府。給事中勾濤薦自代。詔赴行在所。既至。而勾濤出。不得見。文若奏書請對。

翌日。召對便殿。高宗大悅。特旨改合入官。通判洋州。洋之西鄉縣產茶。亘陵谷八百餘里。山窮險。賦不盡括。使者韓球將增賦以市寵。園戶避苛斂。轉徙饑饉相藉。文若力爭之。賦迄不增。再通判遂寧府。會大水。民多漂溺。文若至城上。發庫錢募游者。賑活甚衆。又力請于朝。除田租二萬一千頃。免場務稅二十餘所。築長堤以捍水勢。自是無水患。秦檜死。帝訪蜀士於魏良臣。以文若對。二十六年。以光祿丞召。改祕書郎。為文思箴以獻。其畧曰。於赫我皇。兵既休矣。兵休如何。莫若治兵。居安思危。

邦乃攸寧。爰整其旅。文王以興。載舞干羽。舜仁用成。向戍弭兵。春秋所懲。蕭俛去兵。禍亂乃萌。師則多矣。軍則彊矣。縱弛不繩。猶曰無人。兵非以殘。以兵休兵。凡千五百餘言。自檜主和。朝論諱言兵。故文若以此風焉。遷起居郎。勸帝收用西北人材。以固根本。帝深納之。將命以掌制。時有為宣和參政請恩。為司諫凌哲所彈。文若喜其直。作禾黍詩以美之。侍御史周方崇以為譏已。劾文若狂誕。出知邵州。帝屢為近臣言。唐文若無罪。可改近郡。知饒州。興學宮。減田租奇耗二萬石。又請歲糴常平。

義倉之儲什三。與民平市。農末俱利。而粟不腐。遂以著令。屬邑嘗有劇盜。巡尉不能制。文若遣牙兵捕而戮之。加直敷文閣。移知溫州。三十一年。召為宗正少卿。金人侵邊。文若首建大臣節制江上之議。復除起居郎。時諸將北出。捷書日聞。上下有狃志。獨文若憂之。圖上元嘉北伐故事。未幾。諸軍退守。金主自將。圍大將王權于歷陽。權遁。淮南盡沒。詔百官廷議。文若畫三策。一請帝親征。二乞遣大臣勞軍。三乞起張浚。工部侍郎許尹是其言。衆遂列奏上之。不報。文若尋面對。帝問曰。今計安出。

卿熟張浚否。文若曰。浚守道篤學。天下屬望。今四十年矣。天不死浚。嶺海正為今日。帝矍然。起浚知平江府。蓋帝以浚雖忠慤。將士多不附。文若復言。浚本以孤忠得衆。尋改浚鎮建康府。將以為江淮宣撫使。中沮之而止。乘輿幸江表。以起居郎兼給事中。直學士院。同羣司居守。駕還。遷中書舍人。孝宗嗣位。張浚以右府都督江淮軍事。文若時以疾請外。除敷文閣待制。知漢州。尋改都督府參贊軍事。浚使行邊。按守備未還。除知鼎州。改江州。明年。浚入相。都督府罷。其冬。金復大入。官軍悉戍淮。文

若謂上流當嚴兵備。以定民志。奏籍鄉丁五萬。訓練有法。人倚以固。解嚴和糴。大起郡之數八萬。文若以民勞堅請。得減什三。乾道元年卒。贈左通奉大夫。

李燾。字仁甫。眉州丹稜人。唐宗室曹王之後也。紹興八年。擢進士第。調華陽簿。再調雅州推官。改秩知雙流縣。仕族張氏子。居喪而爭產。燾曰。若忍墜先訓乎。盍歸思之。三日復來。迄悔。艾無訟。又有不白其母而鬻產者。燾寘之理。豪強斂迹。燾恥讀王氏書。博極載籍。慨然以史自任。本朝典故。尤悉力研覈。做司馬光資治通鑑例。斷

按靖康宋史誤作建康今改正謹加案聲明

自建隆。迄于靖康。

按靖康宋史誤作建康今改正謹識

為編年一書。名曰

長編。仍效光體。為百官公卿表。史官以聞。詔給札來上。制置使王剛中辟幹辦公事。知榮州。榮因溪為隍。夏秋率苦水潦。燾築防捍之。除潼川府路轉運判官。入境。劾守令不職者四人。縣多聚斂。燾括一路財賦額。通有無。酌三年中數。定為科約。上之朝。頒之州縣。乾道三年。召對。首舉藝祖治身治家治官治吏典故。以為恢復之法。乞增置諫官。許六察言事。請練兵。毋增兵。杜諸將私獻。覈軍中虛籍。除兵部員外郎。兼禮部郎中。會慶節上壽。

在郊禮散齋內。議權作樂。燾言漢唐祀天地散齋四日。致齋三日。建隆初郊亦然。自崇寧大觀。法周禮祭天地。故前十日受誓戒。今既合祭。宜復漢唐及建隆舊制。庶幾兩得。詔垂拱上壽止樂。正殿為北使權用。正除禮部郎中。言中興祭禮未備。請以開寶通禮。嘉祐因革禮。政和新儀。令太常寺參校同異。修成祭法。四年。上續通鑑長編。自建隆至治平。凡一百八卷。五年。遷祕書少監。兼權起居舍人。尋兼實錄院檢討官。子厚。試賢良方正直言極諫科。燾素謂唐三百年不愧此科者。惟劉去華。心

慕之。嘗以所著通論五十篇。見蜀帥張燾。欲應詔。不偶而止。至是吏部尚書汪應辰薦。厚文行可應詔。故有是命。左相陳俊卿出知福州。右相虞允文任恢復事。更張舊典。以燾數言事。不樂。燾遂請去。除直顯謨閣。湖北轉運副使。陞辭。以欲速變古為戒。又奏禹貢九州。荆田第八。賦乃在三。人功既修。遂超五等。今田多荒蕪。賦虧十。八。帝命之條畫。既至。奏荆湖之民。結茅而廬。築土而坊。傭牛而犁。糴種而殖。穀苗未立。睥睨已多。有橫加科斂者。今宜寬侵冒之禁。依乾德詔書。止輸舊稅。廣收募之

術。如咸平元豐故事。勸課有勞者推恩。詔從之。總餉呂游問入奏。燾攝其事。歲饑。發鄂州大軍倉賑之。僚屬爭執不可。燾曰。吾自任。不以累諸君。尋如數償之。游問返。果劾燾專。帝止。令具析。不之罪也。八年。直寶文閣。帥潼川。兼知瀘州。首葺石門堡。以扼蠻界。奏乞戒茶馬司。市叙州羈縻馬。毋溢額。戒官民毋於禁山伐木造舟。奏移鎖水於開邊舊池。皆報可。淳熙改元。被召。適城中火上。章自劾。提刑何熙志奏焚數不實。且言長編記魏王食肥羸。語涉誣謗。帝曰。憲臣按奏火數失實。職也。何預國

史。命成都提刑李繁究火事。詔熙志貶二秩。罷。燾止貶一秩。燾及都門。乞祠。除江西運副。且許臨遣。或勸以方被讒。無及時事。燾曰。聖主全度如此。竭忠所以為報。遂奏日食地震。皆陰盛。不可不慮。且申母變古。母欲速。兩言。又上快箴。引太祖罷朝。悔乘快決事。以諫。帝曰。朕當揭之座右。進祕閣。修撰。權同修國史。實錄院同修撰。燾為左史時。嘗乞復行明堂禮。謂南郊明堂。初無隆殺。合視圜壇。特免出郊浮費。至是申言之。詔集議。嬖幸沮止。其後周必大為禮部尚書。申其說。始克行。權禮部侍郎。

七月壬戌。雷震太祖廟柱。壞鴟尾。有司旋加修繕。燾奏非所以畏天變。當應以實。帝諭大臣曰。燾愛朕。屢進謹言。賜金紫。嘗請正太祖東向之位。四年。駕幸太學。以執經特轉一官。燾論兩學釋奠。從祀孔子。當升范仲淹。歐陽修。司馬光。蘇軾。黜王安石父子。從祀武成王。當黜李勣。衆議不叶。止黜王雱而已。真拜侍郎。仍兼工部。薦呂祖謙有學識。召為祕書郎。兼檢討官。夜直宣引。奏近者蒙氣蔽日。厥占不肖者祿。股肱耳目。宜謹厥與。尋詔監視太史測驗天文。厓既中制科。為祕書省正字。尋遷著

作郎。兼國史實錄院修撰檢討官。父子同主史事。搢紳榮之。燾感帝知遇。論事益切。每集議。衆莫敢發言。獨條陳可否。無所避。近臣復舉其次子塾。應制科。以閣試不中。程黜。厓偶考上舍試卷。發策問制科。為御史所劾。語連及燾。厓罷。燾亦知常德府。初政和末。澧辰沅靖四州。置營田。刀弩手。募人開邊。范世雄等附會擾民。建炎罷之。乾道間。有建請復置者。燾為轉運使。嘗奏不當復。已而提刑尹機迫郡縣行之。田不能給。燾至是。又申言之。請度田立額。且約帥臣張栻列奏。詔從之。境多茶園。往

時禁切商賈。率至交兵。燾曰。官捕茶賊。豈禁茶商。聽其自如。訖無警。累表乞間。提舉興國官。明堂大禮成。以其首議。復除敷文閣待制。頃之。屋塾繼亡。帝欲以吏事紓燾憂。起知遂寧府。七年。長編全書成。上之。詔藏祕閣。燾自謂此書寧失之繁。無失之畧。故一祖八宗之事。凡九百七十八卷。卷第總目五卷。依熙寧修三經例。損益修換四千四百餘事。帝謂其書無愧司馬遷。燾嘗舉漢石渠白虎故事。請帝稱制臨決。又請冠序。帝許之。竟不克就。又奏陛下即位二十餘年。志在富彊。而兵弱財匱。與

教民七年。可以即戎者異矣。一日。召對延和殿。講臣方讀陸贄奏議。燾因言贄雖相德宗。其實不遇。今遇陛下。可謂千載一時。遂舉贄所言切於今。可舉而行者。數十事。勸帝力行之。帝有功業不足之嘆。燾曰。功業見乎變通。人事既修。天應乃至。進敷文閣學士。提舉佑神觀。兼侍講。同修國史。薦尤袤。劉清之。十人為史官。因轉對。乞用祖宗故事。召宰執赴經筵。太史言十一月朔。日當食心八分。燾復條上古今日食是月者三十四事。因奏之曰。心天王位。其分為宋。十一月。於卦為復。方潛陽時。陰

氣乘之。故比他食為重。非小人害政。即敵人窺中國。明日對延和殿。又及晉何曾譏武帝無經國遠圖。十一年春。乞致仕。優詔不允。帝數問其疾。增損給事中宇文价傳旨。燾曰。臣子戀闕。非老病忍乞骸骨。因叩价時事。勉以忠蓋。又聞四川乞減酒課額。猶手劄贊廟堂行之。病革。除敷文閣學士。致仕。口占遺表云。臣年七十。死不為天所恨。報國缺然。願陛下經遠以藝祖為師。用人以昭陵為則。辭氣舒徐。乃卒。帝聞嗟悼。贈光祿大夫。謚文簡。他日謂宇文价曰。朕嘗許燾大書續資治通鑑長編。

七字。且用神宗賜司馬光故事為序冠篇。不謂其止此。燾性剛大。特立獨行。在從列。每正色以訂國論。張栻嘗曰。李仁甫如霜松雪栢。無嗜好。無姬侍。不殖產。平生生死文字間。長編一書。用力四十年。葉適以為春秋以後。纔有此書。累贈太師溫國公。子厚。去。塾。壁。真。壁。真。皆執政。別有傳。

續通志

列傳 一百十六

宋

尤袤

謝諤

顏師魯

袁樞

李椿

劉儀鳳

張孝祥

尤袤字延之。常州無錫人。少穎異。入太學。以詞賦冠多士。尋冠南宮。紹興十八年。擢進士第。嘗為泰興令。問民疾苦。皆曰邵伯鎮置頓。為金使經行也。使率不受而空厲民。漕司輸藁秸。致一束數十金。二弊久莫之去。乃力

請臺閫奏免之。縣舊有外城，屢殘於敵，頽毀甚。表即修築。已而金渝盟，陷揚州，獨泰興以有城得全。吏民為立生祠。注江陰學官。需次七年，為讀書計。從臣以恬退薦。召除將作監簿。太宗正闕丞，人爭求之。陳俊卿曰：「當予不求者。」遂除表。累遷著作郎，兼太子侍讀。先是，張說自閣門入西府，士論鼎沸。從臣因執奏而去者數十人。表率三館上書諫，且不往見。後說留身密奏，於是梁克家罷相。表與祕書少監陳騏各與郡。表得台州，有毀表者，帝疑之，使人密察。民誦其善政不絕口，乃錄其東湖四

詩歸奏。帝讀而歎賞，遂以文字受知。除淮東提舉常平。改江東。歲旱，單車行部，覈一路常平米，通融有無，以之賑貸。朱熹知南康，講荒政，下五等戶，租五斗以下，悉蠲之。表推行於諸部，民無流殍。累進直敷文閣。江東提刑以梁克家薦，召對，言水旱之備，惟常平義倉。願預飭有司，隨市價，禁科抑，則人自樂輸，必易集事。除吏部郎官。太子侍講，累遷樞密都承旨。兼左諭德，輪對。又申言民貧兵怨者甚切。夏旱，詔求闕失。表上封事，大畧言天地之氣，宣通則和，壅遏則乖。人心舒暢則悅，抑鬱則憤。催

科峻急而農民怨。闕征苛察而商旅怨。差注留滯而士大夫有失職之怨。廩給朘削而士卒有不足之怨。奏讞不時報而久繫囚者怨。幽枉不獲伸而負累者怨。強暴殺人。多特貸命。使已死者怨。有司買納。不即酬價。負販者怨。人心抑鬱。所以感傷天和。方今救荒之策。莫急於勸分。輸納既多。朝廷吝於推賞。乞詔有司。檢舉行之。淳熙十四年冬十月。除太常少卿。自南渡後。典禮散失。每有討論。悉付之衰。斟酌損益。便於今而不戾於古。高宗廟號。從衰所議也。時詔皇太子參決庶務于議事堂。衰言

按續綱目宋通鑑俱作乞俟
附廟之後便行懇辭其載尤
衰語較詳宋史原文只作乞
便懇辭今據改正謹加案聲
明

於太子曰。儲副之位。止於侍膳問安。不交外事。撫軍監國。自漢至今。多出權宜。乞俟附廟之後。便行懇辭。以彰

殿下令德。

按續綱目宋通鑑俱作乞俟附廟之後便行懇辭宋史本傳作乞便懇辭攷續綱目等書載尤衰語有云大權所在天下之所爭趨甚可懼也願殿下事無大小一取上旨而後行情無厚薄一付眾議而後定據此則當有俟附廟後之語史文蓋刪節之誤也今據續綱目等書改正謹識

權禮部侍

郎。兼同修國史。侍講。又兼直學士院。力辭。聽免直學士。孝宗嘗論人才。衰奏曰。近召趙汝愚。中外皆喜。如王藺亦望收召。帝曰。然。兼權中書舍人。復詔兼直學士院。力辭。且薦陸游自代。帝不許。時內禪議已定。猶未諭大臣。

也。是日諭袁曰。旦夕制冊甚多。非卿孰能為者。故處卿以文字之職。袁乃拜命。內禪一時制冊。人服其雅正。光宗即位甫兩旬。開講筵。袁奏願謹初戒始。孜孜興念。又奏凡事失之於初。則後不可救。書曰。慎厥終。惟其始。又歷舉唐太宗不私秦府舊人為戒。復論官制。謂武臣諸司使八階為常調。橫行十三階為要官。遙郡五階為美職。正任六階為貴品。祖宗以待邊境立功者。近年舊法頓壞。使被堅執銳者。積功累勞。僅得一階。權要貴近之臣。優游而歷華要。請舉行舊法。姜特立以為議已。言者因

指以為周必大黨。遂與祠。紹熙元年。起知婺州。改太平州。除煥章閣待制。召除給事中。既就職。即昌言曰。老矣。無所補報。凡貴近營求內除。小礙法制者。雖特旨令書。有去而已。必不奉詔。甫數日。中貴四人希賞。欲自正使轉橫行。袁繳奏者三。竟格不下。兼侍講。入對。言願上謹天戒。下畏物情。內正一心。外正五事。澄神寡欲。保毓太和。虛己任賢。酬酢庶務。陳源除在京宮觀。耶律庫們舊作適嘿今除承宣使。陸安轉遙郡。王成特補官。謝淵李孝改正友。賞轉官。吳元允。夏永壽。遷秩。皆論駁之。帝並聽納。韓

侂胄以武功大夫。和州防禦使。用應辦賞。直轉橫行。袁
繳奏。謂正使有正法。可回授。不可直轉。侂胄勲賢之後。
不宜首壞國法。開攀援之門。奏入。手詔令書行。袁復奏。
侂胄四年間。已轉二十七年。合轉之官。今又欲超授四
階。復轉二十年之官。是朝廷官爵。專徇侂胄之求。非所
以為摩厲之具也。命遂格。帝以疾。一再不省。重華宮。袁
上封事曰。壽皇事高宗。歷二十八年如一日。陛下所親
見。今不待倦勤。以宗社付陛下。當思所以不負其託。望
勿憚一日之勤。以解都人之惑。後數日。駕即過重華宮。

侍御史林大中。以論事左遷。袁率左史樓鑰論奏。疏入。
不報。封駁。不書黃。耶律庫們復以手詔除承宣使。一再
繳奏。輒奉內批。特與書行。袁言天下者。祖宗之天下。爵
祿者。祖宗之爵祿。壽皇以祖宗之天下傳陛下。安可私
用祖宗爵祿。而加於公議不允之人哉。疏入。帝震怒。裂
去後奏。付前二奏出。袁以後表不報。使吏收閣命。遂不
行。中官謁家廟。官吏推賞者百七十有二人。袁力言其
濫。乞痛裁節。帝從之。嘗因登對。專論廢法用例之弊。至
是復申言之。除禮部尚書。駕當詣重華宮。復以疾不出。

率同列奏言壽皇有免到宮之命願力請而往庶幾可
以慰釋羣疑增光孝治後三日駕隨出尋兼侍讀上封
事曰近年以來給舍臺諫論事往往不行如黃裳鄭汝
楷事遷延一月陳源奉祠人情固已驚愕至姜特立之
召尤為駭聞向特立得志之時昌言臺諫皆其門人竊
弄威福一旦斥去莫不誦陛下英斷今遽召之自古去
小人甚難譬除蔓草猶且復生况加封殖乎時帝已屬
疾國事多舛衰積憂成疾請告不報疾篤乞致仕又不
報遂卒遺奏勸帝以孝事兩宮以勤康庶政察邪佞護

善類贈金紫光祿大夫衰少從喻樗汪應辰游樗學於
楊時時程頤高弟也方乾道淳熙間程氏學稍振忌之
者目為道學將攻之衰在掖垣首言夫道學者堯舜所
以帝禹湯武所以王周公孔孟所以設教近立此名詆
訾士君子故臨財不苟得所謂廉介安貧守分所謂恬
退擇言顧行所謂踐履行已有恥所謂名節皆目之為
道學此名一立賢人君子欲自見於世一舉足入其中
俱無得免此豈盛世所宜有願循名必責其實聽言必
觀其行人才庶不壞於疑似孝宗曰道學豈不美之名

正恐假託為姦。使真偽相亂。爾待付出戒救之。表沒數年。仇胄擅國。於是禁錮道學。賢士大夫皆受其禍。識者以表為知言。嘗取孫綽遂初賦以自號。光宗書扁賜之。嘉定五年。謚文簡。子棊。棊。孫焞。

謝諤。字昌國。臨江軍新喻人。紹興二十七年。中進士第。調峽州夷陵縣主簿。未上。撫之樂安。多盜。監司檄諤攝尉。條二十策。大要使其徒相糾。而以信賞隨之。羣盜果解散。金渝盟。諸軍往來境上。選行縣事。有治辦聲。改吉州錄事參軍。囚死者舊瘞以靺。往往暴骨。諤白郡。取船

官棄材。以棺斂之。郡民陳氏。僮竊其篋以逃。有匿之者。陳訴於官。詞過其實。反為匿僮者所誣。帥龔茂良怒。欲坐以罪。諤為書白茂良。陳氏獲免。茂良亦以是知之。歲大祲。飢民萬餘求廩。官吏罔措。諤植五色旗。分部給糶。頃刻而定。知袁州分宜縣。縣積負於郡數十萬。歲常賦外。又征緡錢二萬餘。諤乃疏其弊於諸監司。請免之。除幹辦行在諸司糧料院。遷國子監簿。尋擢監察御史。奏減袁州分宜秀州華亭月椿錢。諤里居時。創義役法。編為一書。至是上之。詔行其法於諸路。民以為便。遷侍御

按宋通鑑載淳熙十六年三月廢補闕拾遺官謝諤論其不可廢不聽宋史本傳失載今據增輯謹加案聲明

史再遷右諫議大夫兼侍講嘗因進講論及邊事帝有乘機會之諭諤曰機會雖不可失舉事亦不可輕光宗登極獻十箴又論二節三近所當節者曰宴飲曰妄費所當近者曰執政大臣曰舊學名儒曰經筵列職除御史中丞會廢補闕拾遺官諤論其不可廢按宋通鑑十六年二月光宗受禪三月己未廢補闕拾遺官御史中丞謝諤論其不可廢不聽自是近臣罕進言者此事宋史本傳失載今據通鑑增謹識權工部尚書請祠以煥章閣直學士知泉州又辭提舉太平興國宮紹熙五年卒贈通議大夫諤為文倣歐陽修曾鞏初居縣南之竹坡名其燕坐

曰艮齋人稱艮齋先生周必大薦士及諤姓名孝宗曰是謂艮齋者耶朕見其聖學淵源五卷而得之云

顏師魯字幾聖漳州龍溪人紹興中擢進士第歷知莆田福清縣嘗決水利滯訟闢陂洫綿四十里歲大祲發廩勸分有方而不過糴價船粟畢湊市糴更平鄭伯熊為常平使薦于朝帥陳俊卿尤器重之名為官告院遷國子丞除江東提舉時天雨土日青無光都人相驚師魯陛辭言田里未安犴獄未清政令未當忠邪未辨願詔中外極陳得失求所以答天戒銷患未形帝聽其言

尋改使浙西。役法敝甚。細民至以雞豚鬻搨折產力。遇役輒破家。師魯下教屬邑。預正流水籍。稽其役之序。寬比限。免代輸。咸便安之。鹽課歲百餘萬。本錢久不給。亭竈私鬻。禁不可止。刑辟日繁。師魯搏帑緡。盡償宿負。戒官吏毋侵移。比旁路課獨最。帝謂執政曰。儒生能辦事如此。予職直祕閣。農民有墾曠土成田。未及受租者。姦豪多為己利。師魯奏。但當正其租賦。不應繩以盜種法。失劬農重本意。奏可。遂著為令。入為監察御史。遇事盡言。無所阿撓。有自外府得內殿宣引。且將補御史員闕。

師魯奏宋璟召自廣州。道中不與楊思勗交一談。李鄘恥為吐突承璀所薦。堅辭相位不拜。士大夫未論其才。立身之節。當以璟鄘為法。今其人朋邪之迹。人所切齒。縱朝廷乏才。寧少此輩乎。臣雖不肖。羞與為伍。命乃寢。繼累章論除職。師魯者。比年好進之徒。平時交結權倖。一紆郡紱。皆培克以厚苞苴。故昔以才稱。後以貪敗。淳熙十年。繇太府少卿。為國子祭酒。初。帝諭執政。擇老成端重者。表率太學。故有是命。首奏宜講明理學。嚴禁穿鑿。俾廉恥興。而風俗厚。師魯學行素孚。規約率以身先。

與諸生言。孳孳以治已立誠為本。藝尤異者。必加獎勸。由是人知飭勵。帝聞之。喜曰。顏師魯到學未久。規矩甚肅。除禮部侍郎。尋兼吏部。有旨改官班。特免引見。師魯獻規曰。祖宗法度。不可輕弛。願始終持久。自強不息。因言賜帶多濫。應奉微勞。皆得橫金。如觀瞻何。且臣下非時之賜。過於優隆。梵舍不急之役。亦加賜賚。雖南帑封樁。不與大農經費。然無功勞而槩與之。是棄之也。萬一有為國制變禦侮。建功立事者。將何以旌寵之。與尤衰。鄭僑上議高宗廟號。尋充遺留禮信使。沿途宴設。力請徹

樂。至燕山。復辭簪花執射。金主鑒其誠。許之。遷吏部侍郎。尋除尚書。兼侍講。屢抗章請老。以龍圖閣直學士知泉州。臺諫侍從。相繼拜疏。引唐孔戣事以留行。內引奏言。願親賢積學。以崇聖德。節情制欲。以養清躬。在泉三年。專以恤民寬屬邑為政。始至。即蠲船貨。諸商賈尤服其清。再起知泉州。致仕。紹熙四年卒。師魯自幼莊重若成人。孝友天至。常曰。窮達自有定分。枉道希世。徒墜所守。故其大節確如金石。雖動與俗情不合。而終翕然信服。嘉泰二年。詔特諡定肅。

袁樞字機仲。建之建安人。幼力學。周必大。劉珙。皆期以遠器。試禮部詞賦第一人。調温州判官。教授興化軍。乾道七年。為禮部試官。就除太學錄。輪對。疏三事。一論開言路以養忠孝之氣。二論規恢復。當圖萬全。三論士大夫多虛誕。僥榮利。張說自閤門。以節鉞簽樞密。樞與學省同僚共論之。帝雖容納而色不怡。樞即求外補。出為嚴州教授。樞常喜誦司馬光資治通鑑。苦其浩博。乃區別其事而貫通之。號通鑑紀事本末。參知政事龔茂良奏其書。孝宗嘉嘆。他日帝問袁樞今何官。茂良以實對。

帝曰。可與寺監簿。於是以大宗正簿召。登對。即因史書歷陳往事。自漢武而下。至唐文宗。偏聽姦佞。啓禍亂。且曰。固有詐偽而似誠實。儉佞而似忠鯁者。苟陛下日與圖事於帷幄中。進退天下士。臣恐必為朝廷累。遷太府丞。時士大夫頗有為黨與者。樞奏曰。人主有偏黨之心。則臣下有朋黨之患。比年或謂陛下寵任武士。有厭薄儒生之心。猜疑大臣。親信左右。內庭行廟堂之事。近侍參軍國之謀。令雖總權綱。專聽覽。而或壅蔽聰明。潛移威福。願可否惟聽於國人。毀譽不私於左右。帝方銳意

恢復。樞奏古之謀人國者。必示之以弱。苟陛下志在復讐。臣願蓄威養銳。勿示其形。復陳用宰執臺諫之術。時議者欲制宗室。應舉鎖試之額。限添差獄詞。減臣僚薦舉。定文武任子。嚴特奏之等。展郊禋之歲。緩科舉之期。樞謂此皆近來從窄之論。人君惟天是則。不可行也。遂抗疏。勸帝推廣大以存國體。兼國史院編修官。分修國史。傳。章惇家以其同里。宛轉請文飾其傳。樞曰。子厚為相。負國欺君。吾為史官。書法不隱。寧負鄉人。不可負天下。後世公議。權工部郎官。累遷兼吏部郎官。兩淮旱。命廩

視真揚廬和四郡。歸陳兩淮形勢。謂兩淮堅固。則長江可守。今徒知備江。不知保淮。置重兵於江南。委空城於淮上。非所以戒不虞。瓜洲新城。專為退保。金使過而指議。淮人聞而嘆嗟。誰為陛下建此策也。遷軍器少監。除提舉江東常平茶鹽。改知處州。樞之使淮。入對也。嘗言朋黨相附。則大臣之權重。言路壅塞。則人主之勢孤。時宰不悅。至是赴闕奏事。又言威權在下。則主勢弱。故大臣逐臺諫以蔽人主之聰明。威權在上。則主勢強。故大臣結臺諫以遏天下之公議。今朋黨之舊尚在。臺諫之

官未正。紀綱言路。將復荆榛矣。除吏部員外郎。遷大理少卿。通州民高氏。以產業事下大理。殿中侍御史冷世光。納厚賂。曲庇之。樞直其事以聞。帝怒。立罷世光。以朝臣劾御史。實自樞始。手詔權工部侍郎。兼國子監祭酒。俄有予郡之命。既而以事貶兩秩。寢前旨。光宗受禪。敘復原官。提舉太平興國宮。知常德府。寧宗登位。擢右文殿修撰。知江陵府。江陵瀕大江。隄壞輒為巨浸。民無所託。楚故城。楚觀在焉。為室廬。徙民居之。以備不虞。種木數萬。以為捍蔽。民德之。尋為臺臣劾罷。提舉太平興國

宮。開禧元年卒。

李椿。字壽翁。洺州永年人。父升。進士起家。靖康之難。升翼其父。以背受刃。與長子俱卒。椿年尚幼。慕殯佛寺。深窺而詳識之。奉繼母南走。艱苦備嘗。極力以養。以父澤補迪功郎。歷官至寧國軍節度推官。吏才精強。人稱之。張浚辟為制置司準備差遣。椿奔走淮甸。綏流民。布屯戍。察廬壽軍情。相視山水。若險要。周密精審。所助為多。隆興元年春。諸將有以北伐之議。上聞者。事下督府。椿方奉檄至巢。亟奏記浚曰。今藩籬不固。儲備不豐。將多

而非才。兵弱而未練。議論不定。縱得其地。未易守也。既而師出無功。浚嘗嘆才難。椿曰。豈可厚誣天下無人。唯不惡逆耳而甘遜志。則庶其肯來耳。浚復除右相。椿知事不可為。勸之去。明年春。浚出視師。椿曰。小人之黨已勝。公無故去朝廷。蹤跡必危。復申前說甚苦。浚心是之。而自以宗臣任天下之重。不忍決去。未幾。果罷。監登聞鼓院。請通判廉州。召對。知鄂州。請行墾田。復戶數千。曠土大闢。移廣西提點刑獄。獄未竟者。一以平決之。釋所疑數十百人。奏罷昭州金坑禁仕者。毋市南物。移湖北

漕。適歲大侵。官強民賑糶。且下其價。米不至。益艱食。椿損所強糶數。而不過其直。未幾。米舟湊集。價減十三。每行部。必前期戒吏。具州縣所當問事。列為籍。單車以行。所至取吏卒備使令。凡以例致饋。一不受。言事者請下諸道為式。召為吏部郎官。論廣西鹽法。孝宗是其說。遂改法焉。除樞密院檢詳官。小吏持南丹州莫酋表。求自宜州市馬者。因簽書張說以聞。椿謂邕遠宜近。故遷之。豈無意。今莫氏方橫。奈何道之以中國地里之近。小吏妄作。將啟邊釁。請論如法。說怒。椿因求去。帝慰諭令安。

職。遷左司。復請外。除直龍圖閣。湖南運副。請減桂陽軍月椿錢萬二千緡。損民稅折銀之直等十三事。俱報可。民刻石紀之。除司農卿。椿會大農歲用米百七十萬斛。而省倉見米僅支一二月。歎曰。真所謂國非其國矣。力請歲儲二百萬斛為一年之蓄。命兼臨安府。視事三月。以權倖不便。解去。椿在朝。遇事輒言。執政故不悅。及是轉對。又言君以剛健為體。而虛中為用。臣以柔順為體。而剛中為用。陛下得虛中之道。以行剛健之德矣。在廷之臣。未見其能以剛中守柔順。而事陛下者也。執政滋

不悅。出知婺州。會詔市牛筋凡五千斤。椿奏一牛之筋纔四兩。是欲屠二萬牛也。帝悟。為收前詔。除吏部侍郎。極言閹寺之盛。曰。自古宦官用事。始則人畏之。甚則人惡之。極則羣起而攻之。漢唐勿論。靖康明受之禍。未遠。必有以裁制之。不使至極。則國家免於前日之患。宦官亦保其富貴。門禁宮戒之外。勿得預外事。嚴禁士大夫兵將官。與之交通。帝納疏袖中以入。又言當預邊備。如欲保淮。則楚州。盱眙。昭信。濠梁。渦口。花廬。正陽。光州。皆不可以不守。如欲保江。則高郵。六合。瓦梁。濡須。巢。湖。北。

峽亦要地也。以病請祠。不許。面請益力。乃除集英殿修撰。知寧國府。改大平州。賜尚方珍劑以遣。既至。力圖上流之備。請選將練習。緩急列艦。上可以援東關濡須。下可以應采石。上章請老。以敷文閣待制致仕。越再歲。帝念湖南兵役之餘。欲鎮安之。謂椿重厚可倚。命待制顯謨閣知潭州。湖南安撫使累辭不獲。乃勉起。至則撫摩凋瘵。復酒稅法。人以為便。歲旱。發廩勸分。蠲租十一萬。糶常平米二萬。活數萬人。告歸。進敷文閣直學士。致仕。椿年十五歲。避地南來。貧無以為養。不得專力於學。年

三十始學易。其言於朝廷。措諸行事。皆易之用。嶷然有守。存心每主於厚。淳熙十年卒。朱熹嘗銘其墓。謂其逆知得失。不假著龜。不阿主好。不詭時譽云。

劉儀鳳。字韶美。普州人。紹興二年。登進士第。後十年。始赴調。尉遂寧府之蓬溪。監資州資陽縣酒稅。為梁州。榮州掾。二十七年。起居郎趙逵舉儀鳳。稱其富有詞華。恬於進取。除諸王宮大小學教授。改國子監丞。遷秘書丞。禮部員外郎。所草牋奏。以典雅稱。孝宗受禪。議上光堯壽聖尊號冊寶。有欲俟欽宗服除者。太常博士林

粟。謂唐憲宗上順宗冊寶。在德宗服中。不必避。備樂而不作可也。儀鳳獨上議曰。謹按上尊號。事屬嘉禮。累朝必俟郊祀慶成。然後舉行。太上皇帝為欽宗備禮終制。見於詔書。議者引憲宗故事。考之唐史。自武德以來。皆用易月之制。與本朝事體大相遠也。乞候欽宗終制。檢舉以行。議者雖是其言。然謂事親當權宜而從厚。竟用栗議。兼國史院編修官。權祕書少監。乾道元年。遷兵部侍郎。兼侍講。儀鳳在朝十年。每歸。即匿其車騎。扃其門戶。客至。無親疎。皆不得見。俸入半以儲書。凡萬餘卷。御

史張之綱。論儀鳳錄四庫書本以傳私室。遂斥歸蜀。三年。輔臣進前侍從。當復職者。帝曰。劉儀鳳無罪。可與復集英殿修撰。起知邛州。改漢州。果州。罷歸。淳熙二年卒。儀鳳苦學。至老不倦。尤工於詩。然頗慕晉人簡傲之風。不樂與庸輩接。故平生多蹭蹬。一跌遂不振云。

張孝祥。字安國。歷陽烏江人。讀書一過目不忘。下筆頃刻數千言。年十六。領鄉書。再舉冠里選。紹興二十四年。廷試第一。時策問師友淵源。秦埴與曹冠皆力攻程氏專門之學。孝祥獨不攻。考官已定埴冠多士。孝祥次之。

曹冠又次之。高宗讀墳策，皆秦檜語。於是擢孝祥第一。授承事郎、簽書、鎮東軍節度判官、諭宰相曰：張孝祥詞翰俱美，故事，殿試第一，次舉始召。孝祥擢第甫一年，即召為祕書省正字，奏乞總攬權綱，以盡更化之美。又言王安石作日錄，一時政事，美則歸己，秦檜信任之專，非特安石。臣懼其作時政記，亦如安石專用己意，乞取已修日歷審正，黜私說，以垂無窮。從之。遷校書郎、尚書禮部員外郎，尋為起居舍人、權中書舍人。初，孝祥登第，出湯思退之門，思退為相，擢孝祥甚峻，而思退素不喜汪澈。孝

祥與澈同為館職，澈老成重厚，而孝祥年少氣銳，往往陵拂之。至是，澈為御史中丞，首劾孝祥，姦不在盧杞下。孝祥遂罷，提舉江州太平興國宮。於是湯思退之客，稍稍被逐，尋除知撫州。年未三十，莅事精確，老於州縣者所不及。孝宗即位，復集英殿修撰，知平江府，事繁劇，孝祥剖決，庭無滯訟，屬邑大姓為姦利，孝祥捕治，籍其家，得穀粟數萬。明年，吳中大饑，迄賴以濟。張浚自蜀還朝，薦孝祥，召赴行在。孝祥既素為湯思退所知，及浚薦，思退不悅。孝祥入對，乃陳二相當同心戮力，以副陛下

恢復之志。且靖康以來。惟和戰兩言。遺無窮禍。要先立自治之策以應之。復言用才之路太狹。乞博采度外之士。以備緩急之用。帝嘉之。除中書舍人。尋除直學士院。兼都督府參贊軍事。俄兼領建康留守。改除敷文閣待制。留守如舊。會金再侵邊。孝祥陳金之勢。不過欲要盟。宣諭使劾孝祥落職。復集賢殿修撰。知靜江府。廣南西路經畧安撫使。治有聲績。復以言者罷。俄起知潭州。為政簡易。時以威濟之。湖南遂以無事。復待制。徙知荆南。湖北路安撫使。築守金隄。自是荊州無水患。置萬盈倉。

續通志

列傳一百十七

宋

李衡

王自中

家

愿

楊恂附

張

綱

張大經

蔡洸

莫

濛

周

淙

劉章

沈作賓

李衡。字彥平。江都人。幼善博誦。為文操筆立就。登進士第。授吳江主簿。有部使者怙勢作威。侵刻下民。衡不忍。以敲扑迎合。投劾歸。後知溧陽縣。專以誠意化民。民莫

不敬。夏秋二稅。以期日榜縣門。鄉無吏迹。而輸送先他邑辦。歷四年。獄未嘗繫一重囚。隆興二年。金侵淮堧。官沿江者多送其孥。衡獨自浙右移家入縣。民心大安。盜起旁境。而溧陽靖晏自如。帥汪澈轉運使韓元吉等列上治狀。詔進一秩。尋召入為監察御史。歷司封郎中。樞密院檢詳官。出知溫婺台三州。加直祕閣。衡引年乞身。除祕閣修撰致仕。帝思其樸忠。旋召落致仕。除侍御史。以老固辭。不獲。命差同知貢舉。會外戚張說以節度使掌兵柄。衡力疏其事。謂不當為人擇官。廷爭移時。改除

起居郎。衡曰。與其進而負於君。孰若退而合於道。五上章請老。仍以祕閣修撰致仕。時給事中莫濟不書教。翰林周必大不草制。右正言王希呂亦與衡相繼論奏。同時去國。士為四賢詩以紀之。衡自宣和間入辟雍。同舍有趙孝孫者。洛人也。其父實師程頤。家學有源。勸衡讀論語。曰。學非記誦詞章之謂。所以學聖賢也。不可有絲毫偽處。衡心佩其訓。雖博通羣書。而以論語為根本。臨沒沐浴冠櫛。儵然而逝。周必大聞之。曰。世謂潛心釋氏。乃能達死生。衡非逃儒入釋者。臨終超然如此。庶幾孔

門所謂聞道者歟。

王自中。字道甫。温州平陽人。少負奇氣。自立崖岸。繇是忤世。乾道四年。議遣歸附人。自中伏麗正門爭論。且言。今內空無賢。外空無兵。當搜羅豪俊。廣募忠義。以圖中原。坐斥徽州。放還淳熙中。登進士第。授舒州懷寧主簿。遷嚴州分水令。以樞密使王藺薦。召對。帝壯其言。將改秩為籍田令。又俾舉所知。且嚮用矣。以諫疏罷。自中本韓彥古客。王藺既薦之。帝大喜。韓彥直。彥質輩。恐其為彥古報讎。力請交結於自中。而密達意近習。謂自中受彥

古賂。伏闕上書。薦彥古為相。帝遣人物色其事。中書舍人王信恒懼。自中入臺。將不利於王淮。知彥直輩譖已行。亟請對。探上意。退即走白右正言蔣繼周。繼周方敢劾奏。讀至受賂伏闕處。帝曰。卿可謂中其膏肓。繼周奏。臣非不知孤蹤忤王藺。但不敢曠職。蓋欲併中藺以媚淮。帝但喜繼周善論事。不知曲折如此。出通判郢州。道除知光化軍。改信州。丁內艱。服闋。還朝。光宗即位。迎謂曰。朕得卿名於壽皇。留為郎可乎。言者不置。主管沖佑觀。起知邵州興化軍。命下而自中已病。慶元五年卒。

家愿。字處厚。眉山人。父勤國。從劉巨遊。與蘇軾兄弟為同門友。王安石久廢春秋學。勤國憤之。著春秋新義。熙寧元豐諸人紛更。而元祐諸賢矯枉過正。勤國憂之。因築室作室喻。二蘇讀之。歎服。愿以紹聖元年進士登第。廷策進士。中書侍郎李清臣擬進策問。力詆元祐之政。愿答策。惟以守九年之所已行者為言。時門下侍郎蘇轍以疏辨策問。舉漢武帝事。觸帝怒。待罪。愿未及知也。因見轍。誦所對。驚喜曰。故人子道同志合。猶若是也。楊畏覆考。專主熙寧元豐。取畢漸為第一。愿遂居下第。元符

三年。以日食求言。愿時為普州樂至令。應詔極論時政。其大要有十。一曰謹始以正本。二曰敬德以格天。三曰謹好惡以防小人。四曰審信任以辨君子。五曰開言路以來直諫。六曰詳聽言以觀事實。七曰破黨議以存至公。八曰登碩德以服天下。九曰從寬厚以盡人才。十曰崇名節以厚士風。疏上。不報。崇寧元年。詔籍元祐元符上書人姓名。愿以選人籍入邪下等。謫監華州西嶽廟。時當改京秩。迄不改。禁錮不調凡十年。大觀四年。孛星出。降赦。黨禁解。始調知雙流縣。通判文州。郡守鄭行純。憑內

侍勢自恣。罷蕃部互市。啓邊隙。愿爭之不從。徑下令復其舊。守怒。交章互奏。俱報罷。而愿以曾入黨籍。謫英州酒稅。量移黃州。數年。始予祠。興元帥臣王庶薦自代。通判果州。靖康初。左丞馮澥薦備諫列。除開封府工曹。京城失守。不克赴。高宗南渡。擢知閬州。會張浚謀大舉。愿謂浚厲兵足穀。以俟機會。浚不悅。以便旨移彭州。有論邊防書。名曰罪言。守彭之明年。乞骸骨以歸。卒。方蘇轍之讀愿策。謂愿少年能不為進取計。異時當以直道聞。恨不及見。輒之言。至是而驗。淳祐間。愿曾孫大西侍

講經筵。因從容及之。帝嘉歎。宣取所上書。又親書西社同門友元符上書人十大字以賜。愿同郡楊恂。丹陵人也。字信仲。元豐五年。登進士第。元符初。知廣都縣。與愿同時上書。語甚切直。越三年。亦同入黨籍。邪下第五等。其書以火不存。

張綱。字彥正。潤州丹陽人。入太學。以上舍及第。徽宗知綱五中首選。特除太學正。遷博士。除校書郎。入對。論君子小人溷淆。詢言試事。則邪正自別。小人得志。邀功生事。禍有不可勝言者。今用事者大言罔上。風俗侈靡。背

本趨末日甚一日。宜以祖考躬行之教為法。天下斯不難化矣。帝稱善。論事與蔡京不相合。擠之去。主管玉局觀久之。還故官。兼修國朝會要。校正御前文字。累遷司勳郎。初朝議遣童貫蔡攸使朔方。綱力論不可出師。狀不報。及金渝盟。逼京闕。命綱分守四壁。旋解嚴。詔登陴。足月者遷。綱曰。主憂臣辱。義當爾。顧因此受賞邪。卒不自言。出為兩浙提刑。移江東。池州將王進剽悍恣睢。曹官以小過違忤。遂釘手于門。事聞。詔綱乘傳窮竟。時國勢未安。諸將往往易朝廷。進擁甲騎數百。突至綱前。綱

叱進下階。即按問。罪立具。自是無越法者。以左司召。權監察御史。請令郡邑月具繫囚存亡數。申提刑司。歲終較多寡行殿最。進起居舍人。改中書舍人。建言乞依祖宗法。命大臣兼領史事。詔宰臣呂頤浩監修國史。著為令。試給事中。宗室令應特轉大中大夫。綱言庶官超轉侍從。非法。且自崇寧以來。官職不循資任。致綱紀大壞。今方丕變其俗。奈何以令應故。復違舊章。詔以次官命詞。舍人王居正復執不行。命遂寢。宣撫使張俊駐師九江。遣營卒以書至瑞昌縣。令郭彥章。揣知卒與獄囚通。

乃械繫之。後愬于朝。彥章坐免。綱言近時州縣吏多獻諛當路。彥章不隨流俗。是能奉法守職。今不獎而黜。何以示勸。除給事中。侍御史魏矼劾綱。提舉太平觀。進徽猷閣待制。引年致仕。秦檜用事久。綱卧家二十年。絕不與通問。檜死。召為吏部侍郎。兼侍讀。言比年監司資淺望輕。請擇七品以上清望官。或曾任郡守。有治狀者為之。庶位望既重。材能已試。可舉其職。從之。權吏部尚書。除參知政事。高宗頻諭輔臣寬恤民力。蓋懲秦檜苛政。期安黎庶。綱乃摘其切於利民八十事。標以大指。

乞鑄版宣布中外。告老。以資政殿學士。知婺州。尋致仕。孝宗登極。召綱陪祀南郊。以老辭。詔嘉之。命所在州郡恒存問。仍賜羊酒。卒。綱嘗書座右曰。以直行己。以正立朝。以靜退高天下。其篤守如此。謚章簡。

張大經。字彥文。建昌南城人。紹興十五年。中進士第。宰吉之龍泉。有善政。諸司列薦。賜對便殿。出知儀真。時兩淮監司帥守。多興事邀功。大經獨以平易近民。民咸德之。提舉湖南常平。提點湖北刑獄。尋移江東。他路有巨豪犯法。獄久不竟。命移屬大經。豪挾權勢求脫。大經卒正其

罪。孝宗嘉其風力。除監察御史。遷大理少卿。守殿中侍御史。言今日不治。由大臣不任責。又言諸路荒政不實。飛蝗頗多。願益加恐懼。申飭大臣。俾內而百官有司。輸忠謹。修厥職。外而監司守臣。察貧理寃。去苛斂。寬民力。帝皆嘉納。因論近習韓侯薦士。帝曰。此亦無害。昔楊得意為狗監。亦嘗薦司馬相如。大經奏恐無廉恥者。望風希旨。傷毀士俗。後數日。帝謂大經曰。卿前所論韓侯。朕思之。誠是也。又論宦者董璉暴橫。將命淮甸。所至誅求。且自號董閻羅。遂罷璉。竄南康軍。除侍御史。言士風未

厚。吏治未肅。民力未蘇。和氣未應。皆由人心未正。願察公正。明義利。以彰好惡。抑浮薄。去貪刻。則莫不靡然洗濯。一歸於正。帝稱善再三。又言監司治民之本。不可限以資格。帝納其言。即選四寺丞。同時臨遣。試右諫議大夫。兼侍講。請通漕臣之計。以補州郡之有無。拘戶絕之租。以廣常平之儲。待嚴賊罪。改正法。以懲貪黷。收外路辟闕歸吏部。以杜私謁。而通孤寒。秋旱。詔求言。大經極言民力竭。軍士貧。二者當今大弊。州縣之間。絹帛多折其估。米粟過收其贏。關市苛征。權酷峻禁。中外兵帥多出

貴倖之門。營利自豐。素召衆怨。教閱減裂。軍容不整。且近習甲第名園。越法踰制。別墅列肆。在在有之。非賂遺何以濟欲。願陛下疎斥儉腐。抑絕倖門。垂意人主之職。責成宰輔。一提其綱。則天下事必有能辦之者。除禮部尚書。兼侍讀。大經屢請祠。帝曰。卿公庶必能為朕牧民。以徽猷閣學士。知建寧府。未幾。移鎮紹興。辭不拜。予祠。進龍圖閣學士。告老。以通奉大夫致仕。寧宗即位。進正議大夫。降詔撫問。慶元四年卒。贈銀青光祿大夫。謚簡肅。

蔡洸字子平。其先興化仙遊人。端明殿學士襄之後。徙雪川。父伸。左中大夫。洸以蔭補將仕郎。中法科。除大理評事。累遷戶部郎。總領淮東軍馬錢糧。知鎮江府。會西溪卒移屯建康。舳舻相銜。時久旱。郡民築陂。瀦水灌溉。漕司檄郡決之。父老泣訴。洸曰。吾不忍獲罪百姓也。卻之。已而大雨。漕運通。歲亦大熟。民歌之曰。我瀦我水。以灌以溉。俾我不奪。蔡公是賴。就除司農少卿。言鎮江三邑稅戶。客戶。輸丁各異。請為一體。不得自為同異。所輸丁絹。依和買之直。計尺折納。人給一鈔。官自買絹起發。公

私皆便。帝嘉納。以戶部侍郎召。試吏部尚書。移戶部。未幾。求去。除徽猷閣學士。知寧國府。奉祠歸。卒。浼事親孝。曾祖襄。未易名。力請于朝。賜謚忠惠。所得俸。每以振親戚之貧者。去朝之日。囊無餘資。至售所賜銀鞍韉。治行人服。其清潔云。

莫濛。字子濛。湖州歸安人。以祖蔭補將仕郎。兩魁法科。累官至大理評事。提舉廣南市舶。張子華以贓敗。朝廷命濛往鞫之。濛正其罪。又言秦熺。鄭時中。受子華賂。計直數千緡。還朝。除大理寺正。黃州倅奏親擒盜五十餘

人。帝命濛窮竟。既至。咸以寃告。濛命囚去桎梏。引倅至庭。詢竊發之由。鬪敵之所。遠近時日。悉皆抵牾。折之。語塞。濛具正犯數人。奏上。餘釋之。除戶部員外郎。遣措置浙西江淮沙田蘆場。帝語之曰。得此可助經費。歸日以版曹處卿。濛多方括責。得二百五十三萬七千餘畝。言者論其丈量失實。徵收及貧民責監。饒州景德鎮。起知光化軍。謀知金渝盟。郡乏舟。衆以為慮。濛力為辦集。及敵侵境。民賴以濟。時餉餽急。除淮南轉運判官。濛遷延不之任。右司諫梁仲敏劾其慢命。罷官勒停。宣諭使汪

澈為言於帝。復舊職。除湖北轉運判官。未幾。知鄂州。召除戶部左曹郎中。出知揚州。陞辭。帝以城圯。命濛增築。重賞激勸。閱數月。告成。除直寶文閣學士。大理少卿。兼詳定司敕令官。權知臨安府。未幾。假工部尚書。使金賀正旦。金庭賜宴。濛以本朝忌日。不敢簪花聽樂。金遣人趣赴濛。堅執不從。使還。除刑部侍郎。改工部侍郎。兼臨安府少尹。以言者罷。起知鄂州。卒。贈奉正大夫。

周淙。字彥廣。湖州長興人。父需。以進士起家。官至左中奉大夫。淙幼警敏。力學。宣和間。以父任為郎。歷官至通

判建康府。紹興三十年。金渝盟。帥守難其選。士夫亦憚行。首命淙守滁陽。未赴。移越州。又徙濠梁。淮楚舊有並山水。置砦自衛者。淙為立約束。結保伍。金海陵傾國侵邊。民賴以全活者。不可勝計。除直祕閣。再任。孝宗受禪。王師進取虹縣。中原之民。翕然來歸。扶老攜幼。相屬於道。淙計口給食。行者攜以牛酒。至者處以室廬。人人感悅。張浚視師。駐于都梁。見淙謀。輒稱歎。且曰。有急。公當與我俱死。淙亦感激。浚入朝。悉陳其狀。帝嘉歎不已。進直徽猷閣。帥維揚。會錢端禮以尚書宣諭淮東。復以淙

薦進直顯謨閣。時兩淮經踐蹂。民多流亡。淙極力招輯。按堵如故。勸民植桑柘。開屯田。帝亦專以屬淙。屢賜親札。淙奉行益力。進直龍圖閣。除兩浙轉運副使。未幾。知臨安府。上言。自古風化必自近始。陛下躬履節儉。以示四方。而貴近奢靡。殊不知革。乃條上禁止十五事。帝嘉納之。賜金帶。臨安駐蹕歲久。居民日增。河流湫隘。舟楫病之。淙請疏浚。工畢。除祕閣修撰。進右文殿修撰。提舉江州太平興國宮。以歸。帝念淙不忘。除敷文閣待制。起知寧國府。魏王出鎮。移守婺州。明年春。復奉祠。亟告老。

卒。積階至右中奉大夫。封長興縣男。

劉章。字文孺。衢州龍游人。少警異。日誦數千言。通小戴禮。四冠鄉舉。紹興十五年。廷對。帝擢為第一。授鎮江軍簽判。是冬。入為正字。明年。遷校書郎。兼普安恩平兩王府教授。遷著作佐郎。事王邸四歲。盡忠誠。專以經誼文學。啓迪掖導。受知孝宗自此始。秦檜當國。噉不附已。風言者媒蘖其罪。出倅筠州。檜死。召為司封員外郎。檢詳樞密院文字。兼玉牒檢討官。累遷吏部侍郎。御史論章使胥長買絹。高宗愕然曰。劉章必無是事。御史執不已。

罷提舉崇道觀。起居郎王佐訟其寃。亦坐黜。起知信州。未久。復請祠。孝宗受禪。念舊學。命知漳州。為諫議大夫。王大寶所格。尋除祕閣修撰。敷文閣待制。召提舉佑神觀。兼侍讀。遂拜禮部侍郎。奏禁遏淫祀。仍于三朝史中。刪去道釋符瑞志。朝廷議經畧中原。調諸郡兵。民頗擾。少卿趙彥端指言非是。或譖彥端曰。陛下究心大舉。凡所圖向。但資趙彥端一笑耳。彥端懼不測。帝因夜對。問章曰。聞卿監中有笑朕者。章對曰。聖主所為人。焉敢笑。若議論不同。或者有之。帝意頗解。彥端獲免。人稱章長。

者。詔詢唐太宗所問魏徵德仁功利優劣。章上疏諄復。且言太宗問徵。在貞觀十六年。陛下宅天命。十載于茲。願益加意。將越商周。紹唐虞矣。太宗非難到也。進權禮部尚書。兼給事中。對選德殿。問章年幾而容貌未衰。頗嘗學道否。章對曰。臣書生。無他長。惟菲儉自處。晏嬰一狐裘三十年不易。人以為難。臣以為易。帝嘉歎久之。章力告歸。以顯謨閣學士。食祠祿。淳熙元年。子之衡由御史檢法。出守廣德軍。陛辭。問卿父安否。旋遣閣門祗候蘇曦。至家宣問。拜端明殿學士。賜銀絹。四年。上表告老。

以資政殿學士致仕。卒。贈光祿大夫。謚曰靖文。章以周密自守。出入兩朝。被顧遇。未嘗泄禁中一語。

沈作賓。字賓王。吳興歸安人。以父任入仕。監饒州永平監。承詔造鴈翎刀。稱帝意。連進兩資。中刑法科。歷江西提刑司檢法官。入為大理評事。通判紹興府。帥守丘室。遇僚吏剛嚴。作賓從容裨贊。每濟以寬。知台州。首訪民疾苦。弛鹽禁。寬租期。均徭役。更酒政。決滯獄。五十日間。盡除前政之不便民者。邦人胥悅。而前守嫉其勝己。巧媒蘖之。罷去。民請留不遂。為立留賢碑。除大理正。累擢

太府卿。以直龍圖閣。帥浙東。知紹興府。入對。奏徽州南康軍。月椿不如期。朝廷科降額。比年曰權免一次。來年督促如初。適足啓吏姦。重民害。乞明詔示。又楚州武鋒一軍。已招三千五百餘人。朝廷初欲減戍。數年未就。紀律。一主將望輕。二郡守節制不為禮。三訓練不盡其能。願領本州。少假借。責之練習。期以歲月。考其績而黜陟之。帝嘉納。韓侂胄方用事。族有居越者。私釀公行。作賓逮捕。寘于獄。而竄其奴。權工部侍郎。繼兼戶部侍郎。奏請修紹興三十一年以前故事。復敕令所刪修官五員。

以待選人有才者。又乞申嚴保伍法。以言者罷歸。起知鎮江府。改知寧國府。潭州。除戶部侍郎。兼詳定敕令官。奏湖北當儲粟。湖南當增兵。未幾。除龍圖閣待制。知平江府。請得節制許浦水軍。詔可。郡有使臣。故海盜也。作賓使招誘其黨。既至。慰勉之。錫衣物。又得強勇者幾千人。置將以統之。號曰義士。復募郡城內外惡少亦幾千人。號曰壯士。衣糧器械。皆視官軍。而輕捷善鬪。過之。於是海道不警。市井無譁。尋命叅贊督府。兼權鎮江府。請留戍兵千人。又欲以江閩新軍二千人。易舊軍千人。

備不虞。朝廷難之。遂請祠。言者繼及之。復召為戶部侍郎。軍興之餘。國力殫耗。見存金穀。僅支旬日。作賓考逋負。祝吏姦。閏三月。即有半年之儲。除權戶部尚書。以顯謨閣直學士。知建寧府。入覲。乞申嚴詭戶之禁。除寶謨閣學士。江西安撫。兼知隆興府。奏部內南安。南康。龍泉。三縣。逼近溪峒。三縣令尉及近峒之砦。秀洲。北鄉。蓮塘。并永新縣之勝鄉。砦。宜就委帥憲兩司。擇才辟置。量加賞格。又乞詔諸道監司。分詣州郡。選禁軍。精練閱。改刺其懦弱者為廂軍。除煥章閣學士。提舉龍興府玉隆萬

壽宮。進顯謨閣學士。致仕。卒。贈金紫光祿大夫。

